

抱真書屋詩鈔

抱真書屋詩鈔卷六

雲南叢書集部之五十四

蒙自 陸應穀 稼堂

清明日雪

春寒料峭欲添衣  
京國清明暖氣微  
柳絮不隨風剪落  
榆錢卻共雪花飛  
彈箏趙女踏青去  
帶酒齊人乞祭歸  
底事袁安尙高卧  
蕭條門巷足音稀

游極樂寺

熱甚思飲冰  
倦來欲伏枕  
蕭然苦疲役  
何處得樂境  
圓通轉法輪  
清涼開勝境  
鬱鬱帝城西  
一片綠雲影  
花多春倍妍  
樹密晝亦永  
策杖叩禪扃  
僧心抱幽靜  
勺水滌

塵襟清風生苦茗歡極藉草坐露溼衣裳冷

重游極樂寺

夙有山林志探幽頗足娛窗虛飛野鳥花密鬧春駒倦  
鶴終栖樹驚駘尙戀芻 君恩歸不得底事憶蓴鱸

丁菊坡明府何丹溪庶常招飲陶然亭卽席有賦  
好景依城闕孤亭得勢高良朋欣聚會勝地共游翱挹  
爽延山色招涼遠市囂蒲深偏礙路水淺不容舠并轡  
行爭疾分杯飲鬪豪濃陰霑石髮嘉味薦溪毛嗜淡宜  
烹茗投甘合啖桃清狂推老輩  
亭中前輩題詩甚多俊逸愧時髦  
何丹溪年甚少珥筆曾供職停車暫息勞性靈誰鼓鑄疴癢快

爬搔放眼真千古歡心此一遭新詩憑月旦壁有佩蘭女史詩眾  
共和舊夢續風騷科目誇拋紵交情感贈袍菊坡壽山皆舊交  
停雲牽別緒悵望此平舉

周春衢通守招飲尺五山莊卽席口占

閒身拚得逐仙車卧向城南賣酒家酩酊一天春已老  
野田開徧蒺藜花

夢中得句云富貴多年亦困人因足成之

自是繁華夢裏身征車久已逐風塵鏡湖會向君王乞  
富貴多年亦困人

采蓮詞

閒邀女伴過溪前自掉扁舟采白蓮折得鮮花無處贈  
歸來拋向枕函邊

采蓮歌

荷葉綠滿塘荷花連水香采花莫采葉葉底有鴛鴦  
結子花已謝含苞花欲吐藉閒未開花豈識心中苦  
蓮花嬌且紅無語笑東風儂面羞花面誰將花比儂

壽芝軒中堂老夫子七十

道光戊戌我師七十斗杓插丑神降有日永福克綽期  
頤大耋純嘏爾常自天用錫秬鬯彝卣式此綸綍冠裳  
之侶濟濟來集兕觥載酌白酒芳溢同聲頌禱鋪芬盡

飾美不勝量受無慚色宏溯華胄肇自周畢代有偉人  
高名竹帛巍巍靈巖洋洋震澤磅礴扶輿靈秀所宅鍾  
毓在斯以光南國嘉辰誕降天門大啟朱帶斯皇乘雲  
至止作瑞 聖朝篤生君子如彼珠玉輝山媚水無雙  
之譽起於稚齒乾隆癸丑策名第一領袖羣英同歸

帝室 帝曰汝才授以史職論思不懈委蛇退食 帝  
曰汝賢不次 簡擢洊歷清班從容就列遠在滇南近  
在於越訖於西江罔不持節 帝曰得士屢命校閱文  
柄是司手握玉尺旣躋卿貳乃陟臺閣 帝曰股肱鹽  
梅用作承天之則磴磴卽卽惟德之臧忠孝無缺其在

于家至性純恪古椿有年遠隔南北上書陳情就養心  
惻皇鑒厥誠許歸故邑怕我色笑盡我勞力惟庭有鹿  
其色純白淮室有蘭馨香不息循彼南陔十載朝夕及  
今作輔天下安樂樞廷載直殷勤吐握士庶其廈賢歸  
其幕相我 聖人明禮備樂俾我小民田耕井鑿天下  
仰之如星與嶽惟公謙沖虛懷受益大海納川不遺羣  
策天其鑒之位以宰執居高自俯永保無極惟公儉約  
不事蓄積金玉安寶田廬安擇天其鑒之豐以祿秩大  
烹之養無有缺失惟公精勤古訓是輯發爲文章油然  
經籍天其鑒之不朽名立惟公仁厚不忌不刻雨露有

惠雲播有液天其鑒之康彊逢吉壽考維祺子孫千億  
伊余小子七年親炙感知至深紀事以實祝公遐齡允  
矣大德

卽事

不覺寒消盡生機滿眼前牡丹經雨活楊柳得春先有  
酒頻中聖無才不慕仙園林多少樹留待曉鶯遷

靜坐

長夜無一事靜坐銷百慮開窗延月入垂簾留香住豈  
無歌舞樂耽此清幽趣蟋蟀抱枯草寒蟬翳高樹物性  
各有適悲鳴催歲暮吾生本如寄戚戚竟何故被衣但

蔽體何用統與素飲食但果腹何必膏粱慕委心隨造化逍遙同大瓠

貢院古槐歌

君不見廣寒殿前有丹桂秋香飛鼻白雲際又不見泰岳峯頂有喬松霜皮溜雨爭化龍我家滇南亦有唐梅與漢柏千載青青不改色茲來貢院觀古槐不知年代誰培栽大鵬展翼羽毛墮潛蛟鼓腹鱗甲開老幹磊砢枝葉稠大癭如斗如疴僂其上飛幢聳蓋直接明連之高樓其下張帷布幄乃與矮屋棘刺相連鉤低覆濃陰數十畝涼飈日午生飈飈比屋黍民忪締構縑絲齊女

同歌謳往往天陰月黑夜疑有神鬼來遨遊  
鵙不敢集烏雀不敢休惟有黃花爛漫時  
雛鸞老鳳數日暫勾留雅頌之聲頌承平  
文章之光射斗牛傳聞此樹有靈氣受其  
庇者多狀頭吁嗟乎眾物芸芸誰擇地時  
會偶逢遂稱異櫟社之櫟竟以不材終天  
年終南之梓乃以有神遭斬刈古槐兮古  
槐天上吳剛不汝守秦時崇封汝何有汝  
但飲露栖烟日與文人相左右關嶺柏龍  
潭梅安得與爾同不朽

闌中十六夜與曹嵐樵舒耀山兩前輩登  
明遠樓纔過中秋三五夜欣登明遠最高  
樓依依雲樹千家晚

莽莽關山一色秋且喜故人陪杖屨不妨杯酒話風流  
掄才自有羣公在閒倚欄杆豁醉眸

明遠樓晚眺

公餘恣休暇危樓肆臨眺西山自秋色遠峯餘殘照浮  
雲帶雨飛歸鴉共蟬噪老樹半青黃林空落葉嘯地高  
心更遠觸我林泉好勢將烟霞伴而無車馬鬧倚欄坐  
待久涼月生海嶠

南郊後大雪喜賦

惟 皇帝在位百靈胥感通 南郊禮告成精意格蒼  
穹嘉祥乃疊降玉戲出天公既鋪苑囿內復灑郊原中

千山共一色不辨樹與峯萬川凍結稜冰花生叢叢蝗  
蟲盡入土明歲卜綏豐喜氣滿蓬華歡聲徧老農額手  
相告語焉知聖人功天心本愛人 帝心愛亦同大德  
兩相契四海慶時雍小臣叨陪從肅穆仰 皇躬自慚  
樽散質幸遭恩遇隆俸入稍有餘退食正雍容把酒上  
高堂歡樂恣無窮旣醉發高吟點綴未云工聊以記歲  
月十九年仲冬

同幹園拾珊春腴三同年至小有餘芳小飲

百年幾日閒當春胡不樂飲酒趁新歡賞花及未落眷  
言邀良友芳園共小酌地僻車馬稀塵埃喜清廓蒲芽

衝泥長荷葉浮水薄煙飛日將暮宿林歡鳥雀旣醉薄  
言歸消夏訂後約

監試中和殿口號

揮毫曾向五雲端任職翻慚解豸冠時凜冰淵臣節在  
同霑雨露聖恩寬是日小有誰堪副爲霖兆霖雨思賢佐詩題  
此處應知珥筆難記得昔年辛苦地吟情都向過來看

望西山

一雨洗塵埃始見西山面突兀聳奇峯蒼茫疊層巘蜿蜒  
蜒千里來遠勢如奔電人家近相接魚鱗紛難辨俯視  
但空青林煙聯一片爽氣豁心目高矚妙愈見安得快

攀躋巖石搜剔徧

和陳慶覃侍御傷心曲

明珠無價玉無瑕  
種得優曇一樹花  
底事人間留不住  
東風吹恨落天涯

絕妙丹青點綴工  
花花草草鬪春風  
從今化作相思子  
不是花紅是淚紅

大雪至朝陽門

高卧誰能穩衝寒  
日日來出門盡車馬  
飛雪滿樓臺  
酒微嫌薄唐花竟自開  
獨憐溝畔柳忽凍遲春催

石華菜

方舟遵前渚草淺荇菜黃白石何嶙嶙宛在水中央有  
華緣石隙貼水揚清芳綠波洗顏色苔箋膩且光薄采  
當晚食沁齒生清涼蕪羹原自美何況思故鄉滇山矗  
蒼蒼滇海浩茫茫遠道莫能致懷此不能忘珍重語故  
人萬里勤寄將

題錢南園先生畫馬

十丈生綃健毫落驚看天廐來銅雀先生善貌神駿姿  
凡骨未肯輕筆削雙眼嘗空冀北羣胸中奇氣蟠煙雲  
早嗤韓幹寫肉俗要與伯時同等倫淋漓墨瀋閒揮灑  
逸態縱橫奔腕下慘淡經營妙入神兩龍掣出空凡馬

一匹鑣色老駉驎卻受金羈伴圉人貼耳祇疑思棧豆  
健蹄誰信蹴飛雲一匹拳毛迴絕俗清泉渴飲噴寒玉  
流珠濺沫花滿身長嘶一聲芳草綠吁嗟此馬不恒有  
千里追風君見否不遇九方漫辨形會逢伯樂須迴首  
風格棱棱別有真轅駒局促那堪論卽今壁上權奇影  
如見當年骨鯁人當年行人曾避路天街舊是乘驄處  
祇容老驥共追蹤未許駑駘能學步遺蹟彫零數十秋  
人間何處覓驂騮風鬃霧鬣愁飛去手澤一縑珍重留

秋闈分校卽事成四章

閨苑羣仙笑語陪持將玉尺許量才眼前得失分明在

事後升沈浪費猜怕有明珠沈渤解時將寶鏡拂塵埃  
廿年辛苦休忘卻曾向龍門點額迴

是非同異總紛拏派別支分不一家惟信此心真似水  
敢矜老眼定無花神從周昉傳時覓爪倩麻姑癢處爬  
最苦欬收仍美處毫釐辨別怕爭差

紛紛校閱盡宗工文字因緣亦不同寶劍豈終沈獄底  
毛錐竟未脫囊中憐才有意推同輩謂樵校香譜君子造命何

人仰相公謂定九中堂無限東園桃與李成陰須待好春風

棘闥深鎖晝沈沈賴有良朋愜素襟謂簫門注東同輩剪

燭連宵閒話舊烹茶餘暇共譚心人如蘭臭應同味材

得桐焦定賞音珍重一枝青鏤管幾回欲下又沈吟

寒雞

好從埽堞覓連栖辛苦窗前警夜雞茅店五更霜氣重  
竹籬一帶月痕低也知凍雀難同語莫似寒蟬不肯啼  
長叫一聲天已白休嗟風雨更淒淒

寒雀

喈喈呼春事已非野田今日雪霏霏自憐養翮未豐滿  
誰信謀生眞細微忍凍祇須求樹宿趨炎切莫傍簷飛  
主人年少矜弓箭新著貂裘射鳥歸

卧雪

蕭條門巷訪應難  
風雪年來倍覺寒  
何處烹羊誇太尉  
幾人埽徑問袁安  
梅花有夢寒同睡  
明月多情忍不看  
一榻支離身健在  
江頭閒卻老漁竿

聽雪

竹外松邊似有聲  
寒宵消息聽分明  
小樓雨意思春夜  
絕塞風威憶漢營  
簷溜斷冰敲玉筍  
爐煨宿火響瓶笙  
呼童試向階前埽  
新得龍團快一烹

唐花五首

水仙

弱質何娟娟  
仙心托秋水  
一枝墮紅塵

京師水仙皆熱以紅土培之

中從此始色共嶺梅爭香怕湘蘭死洛川彼何人微步  
春風裏

碧桃

春色天上來二月苦不早碧桃滿樹花先開春未曉佳  
人薄醉看盈盈一枝小莫誤天台客山深雪未埽

海棠

海棠如嬌娃頰顏客羞避夜寒燒燭照紅妝倦欲睡錦  
帳笑相偎非時工獻媚陽春二三月誰更東風醉

梅花

嶺梅有本性花開不附熱人事忽變更芳心奪勁節室

暖氣先春香多不知雪可憐江頭樹隻影對明月

臘梅

剝臘作花樣得火臘銷鎔須臾萬花綻嫣然生香風耐  
寒質本異向暖心亦同願將陽和氣徧布幽室中

冰牀行

冰牀冰牀乃在城河旁北風肅肅川無梁河腹冰堅堅  
且長行人欲渡無舟航行冰上拉冰牀四足迢遞如牽  
羊十人安坐一人忙坐牀一何穩牽牀一何駛溯洄上  
下飛舸似牀頭踏碎玻璃聲牀尾晶屏照千里山谷霍  
深疲牛凍死江湖浪涸魚斃失水行路難悲不已安得

世路坦平長如此

早起遞封事過御河橋口占

夜長不能寐入朝有封事驅車出門前殘雪白滿地天  
街寂無聲月斜人影細輪蹄過御溝蹴石斷冰碎北  
風肅肅來寒氣侵衣袂九闌尙未開坐待甘濡漑豈不  
樂安眠素餐非吾志區區野人心獻日表誠意

太平鼓

太平鼓聲瑟瑟聞在嚴霜十月中十月北風吹易水一  
擊再擊聲不已聲不已白叟黃童偕歡喜叟醉不能休  
兒嬉不知愁含哺鼓腹將何求金玉滿街珠翠滿樓鴟

梟餓死鳳凰來游爲君擊鼓解君憂金環窸窣連錢動  
白雨千聲破花夢花夢微醒足歌舞聲鼕鼕太平鼓

惡鳥行

南方有惡鳥其名爲鴟梟食母天性絕作翼安可逃忽  
然苑囿飛欲栖琪樹枝鳳凰怒不許命鵬搏擊之鵬來  
梟定死聚族鳴聲悲鳩鳥翻妬鵬毒口啄鵬歸鵬力不  
得展雙翅如雲垂鳩鳥汝何知乃與鴟梟私鴟梟本惡  
鳥留之欲害誰留之欲害誰何以雕隼爲

黃木耳

滇山聳崢嶸古木依空巖炎曦苦蒸鬱化工巧鑱刻葳

蕤木縱垂拳曲藥苗緘土德貌金磬水色殊都咸有疣  
凸榆柳如輪貼松杉初長露腳潤漸老雲頭嵌厚薄綴  
珠璫參差排石帆割蠟蜂房裂茁花鹿口銜外涇漬泥  
肥中乾雕石巉種同烏足密摘勞女手摻言採黃獨苗  
齊持白木鑱鼓刀師獻馘啄木鳥競鵲滿筐暴木棉連  
篝烘火炊延年芝共譜餉遠鮓供函瘦削體先輕豐腴  
味絕凡水借許由洗火命大酋監九轉熟丹竈一勺助  
盃槭芳茱馨香薦沸鼎調和嚴鮮剖巨螯蟹新嘗小尾  
蟻煮葵尙羞淡裏鹽不嫌鹹青茄脯非貴黃額臙可芟  
會須招紅友鄉味飽老饒

臘八粥

臘月臘八獻花供佛佛不食肉乃食粥菰菱沿街賣棗  
梨滿釜煮雙弓米熟兒童鼓舞兒欲食粥阿母不許未  
獻祖宗先佛祖一是雪滿碗香供佛獲福家平康佛祖  
佛祖聽我一言願世間無疾病天札痛苦顛連恒河億  
萬生靈咸登法筵佛若謂然吾但食粥與饅果腹遨游  
何用憂煎

寒鐙

青鐙掩映一窗虛兀坐寒窗強校書廿載冰霜開卷後  
五更風雨落花初挂牆有影偕難剗杖何人到敝廬

祇似維摩禪室裏半龕佛火說經餘

寒衾

繡被纏綿記夜分如何千里歎離羣多年鐵冷如工部  
一夕風寒憶細君凍蝶無因成夢幻僵蠶到老尙絲棼  
幾時得伴香篝暖宮餅添來細細薰

歲暮

凜凜歲云暮冰雪方積陰暖日照幽室悲風響遠林晝  
短夜苦長鵲旦闕清音轉環悟終始逝水閱古今勞生  
萬物同後彫節所欽疲茶寄一世悠悠傷我心

京都多高門冠蓋誇戚里軒車何昂昂來往如流水堂

下列竿筌堂上羅甘旨室暖氣候變明燭續短晷貴極賤不知驕多歡未已一旬不九食嗟哉貧居干

青青山上松女蘿縈繞之女蘿本微細所幸附高枝高枝易招風搖蕩無已時弱質不牢固何以攀援爲

狹道逢兩車四輪不並行二婦共一室逼窄長相爭讓德古所貴同心良難能周公勤吐哺姬室頗太平時相苟嫉賢夷狄遂稱兵勢位無定在朝爲若相傾黑白易倒置同異分降升緣隙肆攻詆紛如止樊蠅知命復何憂嗟爾徒營營

老貓卧深屋碩鼠飽倉粟倉粟已將空鼠食猶未足我

欲捕碩鼠鼠多難置獄捕鼠亦何益所願歲大熟  
井蛙不自小跳躍潢池間稱兵本無名赤子命可憐渡  
海八千人室家無一全生存盡爲虜死骨鯨波填受恩  
義不負骨肉甘棄捐哀聲達九重聖人心惻然九州  
大徵兵羽檄飛雲煙控弦四十萬盡赴東南邊時雨人  
所欣偕作眾志堅成功貴因時速進莫遷延

少小誇岐嶷學劍復學書二十舉賢良別家上公車三  
十謁天子入直承明廬悠悠經十年頗慚建樹無東  
南方用兵民力困不蘇天子憂宵旰小臣敢安居感  
憤欲請纓人笑書生愚愚者不愛身知者善全軀葵藿

有本性向日徒區區

貴賤皆有事車馬喧不停誰獨閉門居而能無所營薄  
宦愁重累何況歲將更顧視厨中儲脫粟與菜羹避債  
無巧術聒耳多惡聲出見豪華輩意氣正縱橫東市買  
錦繡西市買花鐙歸來告老妻老妻笑不謗徐徐謂夫  
子毋乃亦世情丈夫志四方所願立聲名感此意良慰  
濁酒聊自傾食檠各知苦飲水但餘清固窮節不改何  
爲負平生

換門神

臘鼓聲中爆竹亂敲除門神例應換門神門神勸爾一

杯酒我官雖卑爾不吾負我家雖貧爾爲吾守四時周  
旋不厭久新神能如舊神否吾聞度朔之山有茶壘能  
執百鬼除凶災我家非高明闔室應不來按劍瞋目胡  
爲哉神兮神兮汝但朝司啟暮司閉管鑰之外非神事  
苞苴不入盜賊不至雞鳴狗吠神知之神知之吾願與  
神終歲無瑕疵

醉司命

蔗餠一甌紅燭映歲晚家家醉司命司命司命我無黃  
羊祭不豐盛酌君旨酒聽我謳詠人生命名必核實造  
化之權神所職吉凶諒有理胡爲乎盜跖長年夷齊餓

死禍福應有數胡爲乎伯道無兒馮唐不遇茫茫九閭  
將誰訴神聞此言笑且怒爾不知命爾終誤命有一定  
不可移墮地哭聲天所賦蛟鱷失水受困螻螳鳴得腐  
鼠反嚇鳳凰君子道其常貧賤庸何傷我聞神言大歡  
喜司命司命與君共醉爲佳耳

賀黃矩卿前輩陞學士

海上三神山弱水繞其隈高高極頂上金室與瓊臺羣  
仙共居之乘雲相往來一念墮塵劫隨風永不回丹成  
列上品如君眞仙才君有父與母千秋壽筵開君有子  
與孫聯步升雲階侍兒董雙成窈窕世無偕大德萃福

社長年除凶災細擘騏驎脯滿酌流霞杯榮膺紫府籙  
指日登三台我自俗緣重面目多飛埃回首望蓬瀛渺  
渺傷心懷

祭詩

有客長安自祭詩聲聲爆竹歲闌時半生辛苦聊償爾  
千載名譽欲問誰過眼光陰成夢幻回頭身世總支離  
長吟不減清狂興塊壘全消酒一卮

有感

渺渺鯨波遠拍天王師不見下樓船巖疆竊據方千里  
丞相專征近一年推轂有人誇拜將登樓何日號籌邊

九州不是無兵力浪說攻心計萬全

嗷嗷哀雁總堪憐渡海傳聞已八千  
九死猶尋乾淨土再生還望太平年  
孤城縱說難恢復赤子何心忍棄捐  
惟願天兵南指處鯨鯢戮盡息烽煙

除夕

殘臘催將別依依似故人燭燒寒夜曙  
酒熟隔年春薄宦長愁老清時莫厭貧  
紙窗佳趣在領畧一番新

有感

士氣國威已不伸忽傳天語降丹宸  
六師雪涕初聞詔九陛殷憂悔用人  
未必和戎輸魏絳有誰渡海破盧

循征南將帥新承命願埽妖氛莫顧身

高城新築勢嵯峨望斷桃花可奈何父老苦遭秦法冷  
遺民猶念漢山河填將灌海冤難盡洗卻舟山恨不磨  
入隩傳聞同義憤王師到日共揮戈

旌旗獵獵滿邊疆誤墮奸謀早撤防本爲犬羊姑不信  
誰知梟獍反猖狂城頭連弩全無備天上機槍尙有芒  
宵旰徒勞吾主慮運籌誰與固金湯

津門扼塞輔郊圻形勢真成屑齒依沿海舊曾銷赤羽  
築臺今又製紅衣援桴此日嚴防盜曲突何人早見幾  
莫道沙洲容易守近來杉板船駛如飛

天壇監禮恭紀一章

食爲民所天祈辛典嚴重丑年寅月望小臣叨陪從晨  
興戒僕人輕車速飛鞚早春餘殘雪石滑冰猶凍恪恭  
赴壇前冠裳百辟共穆穆大聖人周旋禮必中至誠  
能感神馨香和風送是時天無雲簫韶來儀鳳斯世本  
太平有苗徒愚憇井蛙疆跳梁誅夷何足痛不久就殄  
滅願獻平逆頌

元宵雅集

良時不易得秉燭恣夜游况與素心人杯酒話綢繆水

部戴雲帆

今詩伯笑傲凌滄洲學士

黃矩卿前輩

擅扶輪大

雅誰與儔后山

陳亦漁同年

古之人肅然氣如秋公雅饒和

易

丁薇生農部

藹藹春風柔藏之善屬文

楊崑峯編修

軒爽豁醉

眸顧我強追逐汗流僵不休同袍五六人性情膠漆投  
吐詞鋒穎發炙輠脂膏流有時懷時務慷慨抒良籌有  
時賦大言豪宕橫九州歡樂趁佳夕攬勝足勾留此時  
六街上鐙火煊珠樓清歌響遏雲紅妝坐擁裘顧茲文  
字飲寂寞迴不猶樂哉得所志汲古奮前修欣續蘭亭  
集佳句同唱酬仰天發高吟明月正當頭

### 早起

人與春俱早煙光豁遠眸樹留殘月照水帶斷冰流民

力東南竭 君心軫恤憂納言臣職在何以進良謀

題黃矩卿前輩雪棧圖

昔在次仲座

戴雲帆  
水部

讀君紀游篇思君不可見遙遙在

西川蠶叢古天險危棧相鈎連玉節手自持驅馬踏雲

煙掄才重

帝命勤勞敢憚先雨雪何罪罪往還經三

年歸來詩益精奇情妙筆宣乃知山川助所得異陳編

濯足錦江上翹首峨眉巔俯仰思舊游悠悠畫圖間

初見桃花

頗怪東風懶桃紅故故遲自從三月杪始見半開枝人

面曾相識春心尙未知可憐漁父棹待爾已多時

自東便門晚歸

三月春深小雨晴  
麥苗短短柳萸生  
輕車緩踏城東路  
纔聽鶯啼四五聲

送訥夫尹廿一丈廣文南旋

曉風吹離絮  
春陰散桃李  
把酒送君行  
清淚落易水  
君今不得志  
回車故山陟  
一官苜蓿盤  
冗散類寒士  
屈指試春闈  
倏復已廿紀  
十度遭棄遺  
豈伊材不美  
男兒重讀書  
讀書憂患始  
才高神所忌  
名成眾共毀  
古來賢豪輩  
困頓風塵裏  
交謫徧室人  
擲掄來窮鬼  
搔首問彼蒼  
不平胡如此  
豈知造物心  
顛倒良有以  
傅翼兩其足  
戴

角靳之齒才名與富貴兩全無是理屈伸況消長欲泰  
必先否君今文與字高步邁餘子白雪抗古調黃琴諧  
俗耳毋碎伯牙琴終當遇知己爲君勸一杯銷魂此萬  
里

題何丹溪編修玉堂歸娶圖

瓊林宴罷賦催妝年少爭誇傅粉郎乞得君恩歸萬  
里錦衣猶帶御爐香

搗就元霜締夙緣香車遙駐彩雲邊三山自有神仙侶  
不是雲英莫並肩

曹孝子

有序

孝子滇之昆明人家貧父病久不愈孝子夙聞有割股救親之說以爲割股可以療疾則割心當倍於割股乃以刃刺胸探心和藥手捫胸視藥了不知痛其兄自外至指藥示之曰進此父疾可愈兄視之則心突突然猶動于藥鎗中駭極而呼孝子遂放手仆地死吁亦可哀矣爲作

曹孝子

曹孝子世間愚孝那有此孝子家貧父病危籲天無靈色不喜色不喜心碎矣白刃猛一揮破腔供藥餌忍作卷施草救父情難已但欲父生不惜身死孝子身已死

孝子心不毀比千金藏相爲伍我聞此事淚如水吁嗟  
乎孝子世間愚孝那有此

桂英曲

有序

蜀山樂籍滇海女伶雅擅吳歈新來蒙邑燕支  
學賣春濃舞絮之天粉黛新妝色豔破瓜之日  
雖纏頭多錦而繫足有絲來花縣之公子統絳  
多情會蓉城之嬌娃衾裯共命本意家池水暖  
綠鴨穩眠何期離館風高黃鶯惜別北轅遽杳  
莫尋桃徑之香南鴈不歸空灑梨江之淚不堪  
鵲母遂倩鳩媒清酒一杯黃土三尺嗚呼花隨

面以俱殘情根猶在石爲心而不化恨海難填  
命薄憐伊悲深自我續煙花之舊傳或者聊當  
劇譚裁風月之長歌庶幾別有懷抱耳

蜀鳥悲啼三月春花枝零落委芳塵紅牙敲斷檀槽冷  
千載鍾情一美人濯錦江邊小家女明眸皓齒嬌無比  
偶隨阿母到滇南卻擅新聲傾北里新聲譜就蹙蛾眉  
默默深情欲訴誰唱到秋江離別處有人背後淚雙垂  
公子楊家最少年芳姿屢顧意流連明珠十斛黃金萬  
不惜尊前買笑錢三生約定迷香洞午夜春濃新試夢  
羞拈羅帶拭啼痕曾許雙栖一身共佳期穩待銀河渡

春色別尋金屋貯好鳥行看便出籠卻緣後約翻成誤  
誤煞齊東去路賒別船不忍抱琵琶可憐陌上相思子  
不作園中並蒂花阿母那知人意緒新歡苦欲摧錢樹  
石心不轉任鞭笞盼斷魚書朝復暮東園楊柳綠依依  
底事離人不見歸逝水韶華容易過黃鶯啼老燕來稀  
始信男兒眞失行萍飄蓬轉蹤無定如今白首難爲期  
自古紅顏多薄命一杯鵲酒此生捐倩女魂歸離恨天  
瑤瑟久拌今日破玉簫擬結再生緣彩雲散盡琉璃碎  
崔護重來人事異斷送芳容已隔年香幃顧影空如醉  
寶華山畔深埋玉黃月低迷芳草綠鬼唱猶聞宛轉詞

愁銷誰奏淒涼曲好事將成轉眼非歌成紫玉淚霑衣  
香魂寂寞歸何處好趁東風化蝶飛雙飛難遂前生願  
缺陷天公誰復怨賸有堅貞松柏心莫嗟婉孌芙蓉面  
君不見花貌棘心紅粉兒翻雲覆雨無定期然脂又續  
傷心史潦倒情場我亦癡

消夏四詠

湘簾

繡幙何時換新垂一桁簾月篩花影在風纖水波兼草  
綠門相映塵紅座未黏茅齋無客到不捲任香添

蒲扇

何當消溽暑賴此得餘清  
明月入懷滿薰風著手生  
捉應同謝傅贈亦效袁宏  
莫爲秋涼早輕拋笑不情

冷布

妙有新機杼居然似紵絺  
障窗籠霧氣綠陰見花枝  
濯雪粗成片裁冰細作絲  
何須誇火院寒暑各因時

涼棚

閉戶不知暑涼棚一院遮  
旁垂防日脚高聳出簷牙  
蔭添槐樹餘陰在豆花可  
憐田野外火樹照千家

思鄉八吟

南湖

蒙自南門外有湖  
方數里名南湖

朝來太液池邊過忽憶南湖垂釣時  
四水迴波青入眼  
三山列秀翠於眉  
四水三山人行柳下魚相見船坐花間  
鷗不知好境睽違經數載每逢佳日一相思

東園 余別業在東門外南湖下

湖南隄下舊基存曾擬蘭成賦小園半畝餘田皆附郭

四圍種竹欲成村  
園有竹千竿  
好將魚鳥娛朝暮賸有詩書

教子孫  
中有家塾余弟尚教讀於中  
歸計未知何日是家山回首黯

銷魂

麟峯

遙從極北指鄉關萬里何因見故山  
鸚鵡幾曾傳好語

麒麟空自鎖，孱顏峯排寶帶雲。千巖寺打殘鐘，月半彎。  
記得年年寒食後，一回埽墓一登攀。  
余祖墓在山下

鯉海

曾掉扁舟問水濱，飛花蹴浪碧粼粼。一竿斜日漁家樂，  
十里新蒲鷗鳥鄰。載酒亭心游歷舊，買魚村畔往來頻。  
明時不作蓴鱸憶，也爲秋風一愴神。

飛霞寺

寺在尙甸飛霞洞畔，余曾設館於此。

潭生禪院深，藏鎖翠微三年此。地久相依靈湫水，靜涎魚出  
涎魚。古洞雲深蝙蝠飛，滿徑藤蘿餘蔓在。當門桃李幾  
枝稀，回思如錦元都觀。前度劉郎今未歸。

瀛洲亭

右亭跨海號瀛洲四面空濛水氣浮聊與神仙爲窟宅  
亭有呂仙像不妨士女共嬉游碧垂楊柳依花檻紅徧芙蓉  
隱釣舟遙憶故鄉行樂地滿天風雨正新秋

三山

徒聞海上有三山此地分明列翠鬟峰影遙排煙樹裏  
嵐光近在水雲間尋花尙許漁人至載酒時偕好友攀  
李渤幽居原不遠

李石村孝廉住三山寨

何年月下叩柴關

長橋

歷亂溪山曲曲通長橋低跨自西東一灣春水開明鏡

十里晴天落彩虹  
細簇魚苗亭倒影  
輕翻燕麥隴來風  
行人遙指還鄉路  
多在煙波細雨中

抱真書屋詩鈔卷七

雲南叢書集部之五十四

蒙自 陸應穀 稼堂

春詞

阿儂家住若耶溪一帶垂楊覆短隄燕子也知春色好  
雙雙飛向小樓西

春夢沉沉劇可憐乍寒乍暖困人天流鶯底事無聊賴  
苦把新聲攪妾眠

小約尋芳過別村蒼苔微浸繡鞋跟行蹤到處長留記  
一寸弓彎一寸痕

芳辰屈指是花朝撲蝶佳期喜未遙滿院梨花開已白

卻疑殘雪未全消

登樓難禁翠眉顰憔悴如今尙此身誰道儂家腰似柳  
柳絲猶解繫離人

院宇深沈門不開合歡花下強徘徊自家情緒無人解  
春色因何上臉來

斗帳如煙夜氣清濃香四面不勝情前身定是雙飛蝶  
拚得花間過一生

朝來款步玉階前曉露新霽百卉妍折得同心花數朵  
倩郎插向鬢雲邊

午睡初醒日未斜小風吹雨打窗紗香泥不惜污銀甲

閒向階前檢落花

衫影搖紅出柳邊  
貪隨鄰女戲秋千  
近來病體輕如絮  
只恐隨風便上天

夏詞

芍藥開殘淑景過  
芳辰屈指屆清和  
阿儂無計留春住  
一任花飛結子多

鬱蒸天氣困人時  
偏是蕭郎過院遲  
日午碧窗攜手坐  
金釵笑賭一枰棋

寶簪斜溜枕棱傍  
八尺桃笙染汗香  
齊女一聲驚夢覺  
晚風吹送竹陰涼

絮語依依隔錦屏連宵殘夢未全醒最憐扶枕偎人處  
繞髻濃香是素馨

花枝溼透露珠團每向蘭闥具浴盤小婢癡憨勞囑咐  
郎來莫教近前看

曉妝誰與鬪穠華倭髻新盤兩鬢鴉傳粉剛搗明鏡照  
街前唱買玉簪花

冰盤纔薦蜜筒瓜玉碗初烹陽羨茶一例嘗新添懊惱  
箇人昨夜未還家

青梅折得酒頻沽賭酒郎前未肯輸記得昨宵沈醉後  
兜鞋不要侍兜扶

學蕩扁舟向小池蓮蓬折得淚痕滋  
妾心更比蓮心苦祇爲根深不斷絲

韶華漫道早春同漸覺蛾眉畫不工  
妾面若將團扇比願天且莫作西風

秋詞

香肌消瘦不成眠熱惱纔過六月天  
爭奈經秋更憔悴教人錯恨是啼鵑

十二珠簾懶下鉤笙歌徹夜沸高樓  
嫦娥也羨人間樂斜影銜山尙倒留

鵲橋風定水無波今夕雙星說渡河  
姊妹競將瓜果獻

明朝得巧問誰多

梳成螺髻翠新盤  
畫就蛾眉黛未乾  
自覺淡妝增媚媚  
要人扶向月中看

最難將息早涼天  
稱體衣裳疊枕邊  
半臂晚來親手送  
願歡情暖似紅棉

池荷風颭影田田  
乍覺蕭疏不似前  
妾命薄如秋後葉  
郎心願似露珠圓

共命長須矢百年  
盟箋小字記從前  
西風一夜羅幃冷  
莫似青奴便棄捐

小步名園緩緩歸  
丹楓幾樹帶斜暉  
秋光也似春光好

落葉紛紛化蝶飛

蘭閨小坐掩窗紗病起麝盤兩鬢鴉對鏡自憐人影瘦  
捲簾生怕見黃花

窗前已茁早梅枝又是天寒日暮時歡是博山儂是火  
從今夜夜莫分離

冬詞

惱人天氣不勝寒寫就新詞墨半乾摺作同心方勝子  
倩郎鐙下並肩看

紅潮暈臉淺蒸霞小坐圍爐笑語轉怪道冬來顏色好  
美人卻也似唐花

詞譜卷一百一十五  
四  
篆煙縷縷綉簾垂斜倚薰籠默坐時金箸自提閒撥火  
爐灰畫遍寫相思

匆匆短景易消除妾按新歌郎校書拚得一番清事了  
催人又是上燈初

花影相依對玉缸喁喁小語不驚龍纏綿合是紅蠶子  
直到殭時總一雙

共被休教半縫離薰殘麝餅夜深時郎心長似香心暖  
不到天寒總不知

睡時偏急起時慵草草梳頭兩鬢鬆折得臘梅渾不戴  
鏡中怕似病時容

油窗初日射  
瞳瞳微覺  
曉閣曉意烘  
睡起亂盤鴉  
髻了  
下階先看早梅紅

一捻纖腰瘦  
不禁玉肌長怯嫩  
寒侵郎前翻要供歡笑  
新折冰條賽玉簪

紅燭燒殘第幾條  
宜春綵勝費心描  
柔荑卻怕金刀冷  
翦碎花箋強半拋

黃矩卿前輩擬題率成四章

乞藥

搜盡籠中蓄  
秋風病骨侵  
辛酸寒士態  
忼慨故人心  
偶得防難繼  
多求恐不任  
年來貧愈甚  
何處問苓蓼

借書

嗜異真成癖陳編到處搜杖難吹太乙粟似貸莊周繙  
閱經年久傳鈔數月留送遲君莫怪不是借荊州

買花

賸得典衣錢花枝上酒筵貧家聊點綴小屋貯嬋娟顧  
我香猶在憐他影亦妍老慳須強破莫負艷陽天

觀棋

著手卻無端猶爲壁上觀胸中有生死眼底判危安陳  
劫千年幻秋風一局殘何如忘得喪高卧此心寬

妻病

結襦廿餘載恩愛不相疑少年家苦貧歡樂未有期終  
歲勤績紡早起奉盤匱念我衣履穿補綻夜忘疲念我  
下帷苦青鐙伴唔咿園菜翦菰韭涇薪束茅茨上有白  
髮親下有呱呱兒俯仰兩勞心寒暑無怨咨逮我官京  
華萬里遠追隨雖復霑薄祿焉能存餘貲疏食守素風  
荆布仍舊時頭上無華飾篋中無贖衣治生愧余拙相  
對猶顰眉積苦遂成病纏綿恐不支落葉打秋窗中心  
增愴悽幸遇太倉公垣方洞見之時有山西盧筠圃精於岐黃余延之診治  
賴以靈丹起沉疴回春雨露施小愈更加慎調劑良有  
宜公孫念糟糠百里悲展屢屢日與冬夜百歲同所歸

攬鏡

莫拭牆上劍一拭一回惱莫攬匣中鏡一攬一回老  
雨打東園花風吹南陌草人生無百年安能長少好顧影  
發長歎紅顏愁枯槁何如對明月痛飲金樽倒

磨劍

秋風吹易水壯士心不死腰中鹿盧劍龍鳴聲振耳起  
尋鵝鵝膏霍霍拭越砥紅線去無蹤肝胆竟誰示鬼母  
秋郊哭白虹天際起

煮茗

裊裊鶴避煙靄靄香浮空園林得休暇茗戰慄素衷品

永惠山清調火丹爐紅廿年苦塵勞熱惱時填胸七梳  
挹餘芳兩腋生涼風以此長豪飲作歌繼盧仝

和香

薰猶不同器蘭蒿不并采君子與小人勢無並立理以  
類各從同相得益濟美古傳和香方范蔚宗有品評良和香方  
有以沈檀與蘇合清芬兩相喜願盡調變心長坐香國  
裏

秋蝶

休向蘭蓀怨別離繁華過眼已多時一園衰草餘芳歇  
五夜清霜舊夢癡忍凍尙隨殘葉舞尋香不耐晚風吹

雙飛好覓西家去老圃黃華賸幾枝

秋蛩

淒淒切切不勝情無數幽蛩繞砌鳴涼月三更春夢幻  
晚風一曲客心驚徒聞細語連深夜卻送寒威入漢營  
最苦愁人長不寐隔窗傾聽待天明

秋蘆

旅雁銜來近一年寒枝瑟瑟委江邊花飛滿地都成雪  
影落空潭半是煙弱植長愁風蕩漾疏陰合伴水淪漣  
此中尙有伊人在好聽歌聲問釣船

秋樹

庭前長愛影婆娑漸覺蕭疏可奈何好景已經春夏過  
孤根忍待雪霜磨人行官道濃陰少鴉噪荒村落葉多  
莫笑蒼官餘老態凌寒終是舊枝柯

觀我

生

落絮飛花各有因試從初度記良辰啟期何幸爲男子  
房琯無須悟後身一劫已知成夢幻百年畢竟算陳人  
勞生草草真容易回首懸弧又幾春

老

催人歲月太匆匆老態頻添漸不同悟徹餘生耽佛果

懶隨年少入花叢  
衰頹筋力秋風裏  
刹那光陰夕照中  
浪說靈丹能駐景  
世間多少白頭翁

病

滿室空聞煮藥香  
如何卻病竟無方  
學仙到此纔知悞  
嗜酒從前悔未狂  
倦眼已拚書卷棄  
弱軀不耐枕衾涼  
羨他健飯隣家老  
扶杖時來話短長

死

人生到此復何言  
息我還歸造化恩  
久已形骸同物化  
肯將嗔愛惹塵根  
眼前自覺莊周夢  
身後誰招楚客魂  
來去分明同撒手  
空花映水了無痕

觀物

仙

海上三山思杳然  
人間何處訪飛仙  
白雲悵望鄉彌遠  
青鳥無憑信浪傳  
徒說層樓梯十二  
誰知弱水路三千  
還丹未獲刀圭服  
不了塵緣更幾年

鬼

一車異事儘搜羅  
暗室幢幢鬼趣多  
午夜青鐙猶見影  
秋墳紫玉尙聞歌  
世間祇有窮難送  
老去無妨酒暫魔  
莫效阮公空著論  
逢人喜說是東坡

神

廟貌巍然各有靈千秋祀典著明廷人間氣節留忠孝  
天上精光貫日星爲國果能紓大患禱祠亦合薦芳馨  
只愁巫祝多妖妄浪語神君事不經

怪

眼前事事總恢奇習見常聞便不疑駝背分明人共訝  
蟬筐新異鬼難知鑄成禹鼎形還在讀盡山經類恐遺  
可笑儒生偏好怪齊諧續罷語支離

菊香

欲采芳馨寄所思寒香幾縷傍東籬暗飄月下人同澹  
緩送風中蝶不知小朵嗅將微醉後餘芬留到暮秋時

莫嫌晚節蕭疏甚聊伴高人酒一卮

菊影

西風戰晚不勝寒好影分明尙倚闌  
賸得清陰愁細碎恰如好夢喜團圞  
十分瘦與人相對幾樹疏宜月下看  
欲畫全身憑好手傲霜留取一枝殘

老僧

蒲團穩坐掩雙扉悟徹無生漸息機  
說法昔年登上座譯經後代有傳衣  
足跟已倦千山歷身外空將一鉢依  
暮景更無留戀事等閒撒手便西歸

老女

待字深閨叶女貞容華不解誤平生每歌梅標偏多感  
乍見桃夭亦有情鴛譜新描愁易罷蛾眉欲畫恐難成  
年年對鏡猶珍重不是相知莫問名

大雪早朝侍班作

長夜不能寐輾轉天欲明起視紙窗白不知雪滿城驅  
車事倖直冒寒敢憚行出門無坑塹道路坦以平朔風  
何嚴冽肅肅動悲聲方今潢池內逆夷肆稱兵九州急  
征調羽檄飛不停天子勤宵旰勞苦恤民生小臣徒  
備官補救百無能區區葵與藿還抱一心貞長安富貴  
兒意氣方縱橫繡閣羅紅妝室暖氣如春金盃薦芳醕

玉手破新橙。圍爐笑語多。笙歌徹曙鳴。逞茲豪華性。遂  
極逸樂情。豈知海上人。枕戈卧堅冰。

塞黃河

塞黃河黃河之水竹箭過黃河之泥五斗多河決開封  
向南去平田千里生白波十家九家半流離生人血肉  
飽蛟鼉天子惻然命重臣發帑修之經數旬驅役丁  
夫數萬人河未順軌成堅冰塞黃河黃河何時塞滔滔  
洪流來西極乘此冬寒可用力慎毋待桃花水坐視潁  
泗成澤國吁嗟乎歌瓠子築宣房誰挽狂瀾報吾皇  
吾皇盛德千載出榮光

海上戍

北風吹海海山立海上戍卒何慄慄戍卒果何故戍卒  
流涕爲吾訴自從逆夷肆披猖盱食宵衣勞上方 聖  
人赫怒大徵兵高張弧矢射天狼天狼不得滅戍卒不  
敢歇十月海濱冒霜雪鐵甲壓肌肌欲裂何時歌舞欣  
凱撤戍卒爾雖苦戍卒聽我語食主之祿當報主何況  
斬將與搴旗裂土侯封定爾許卽今萬人皆賜裘挾纊  
之 恩古無傳戍卒戍卒爾何憂

禁烏煙

慈烏呀呀逐鬼車鬼車逐不盡野田開遍罌粟花罌粟

花開骨如麻罌粟亦何毒十家食之九家哭西夷流傳  
入中國中國耽之如蛇蝮上有明天子下有賢守牧  
甯容此輩肆鬼蜮申明禁令食者爲戮憫爾蚩蚩刑非  
酷自今以後有田且種穀有錢且食肉毋食烏煙食煙  
罪難贖

戰招寶

招寶山何崔巍十萬貔貅安在哉逆夷稱兵攻定海忠  
臣死義實可哀惜哉葛將軍野死無人爲招魂嗟哉王  
將軍血肉糜爛無一存定海失守招寶招寶之守何草  
草見敵未戰踉蹌倒一朝烏獸散鎮海孤城安能保犬

羊長驅事攻剽哀鴻流離山陰道噫吁噉死者效忠生  
者逃鯨魚跋浪連山高誰其登壇擁節旄揮戈何日櫓  
槍婦運籌帷幄待元老元老奏功胡不早

歲暮詞

東風吹雪如撒沙歲既暮今日欲斜海濱戍卒未還家  
楊柳綻金梅破蕊百花先春闕紅紫河上流民半餓死  
長安車馬紛如雷盡向朱門賀節回

春晚

西山倒掛紅羅幕斜穿日腳魚鱗薄碧空吹送管絃聲  
搖曳風鳶半欲落城南游騎始歸來高燒銀燭海棠開

越女如花同一笑，玉纖重酌玻璃杯。  
醉卧骊駒不知曉，蝴蝶飛遍西園草。  
人生歡樂須及時，駿鳥如箭催人老。  
出守朔平留別

逐隊京華踏軟紅，忽傳新命向雲中。  
九重綸綍恩膏渥，三晉河山驛路通。  
夾道欣看乘竹馬，行人猶說避花驄。  
匆匆苦聽驪駒唱，芳訊何時託塞鴻。

纔信銷魂是別離，一麾西指正春遲。  
連宵細雨花都放，千里停雲酒不辭。  
憶昨故人曾較射，祇今贈我共題詩。  
都門何日重相遇，記取清貧似舊時。

出都

十載住京華仕版已成舊報稱愧無能撫心日滋疚  
天子忽推恩命爲朔方守驅車出都門回望西山秀林  
巒不可見煙景迷清畫東風送行客塵土霑衣袖

依依道畔柳灼灼園中桃栽植雖不久入眼媚春韶及

門二三子英俊皆時髦

謂文小南等

送我十里餘執手心煩

勞欲別不忍別意氣兩投膠雖復聚時暫終傷別路遙  
感子殷勤意小坐酌村醪

塵

三月常無雨紅塵滿路飛香痕隨馬去春色逐人歸誰  
信根難淨須知力已微東風無賴甚助爾駢征衣

風

未免嫌輕薄翻教罵不禁花飛應有恨蓬轉總無心散  
物輕施翦逢人快解襟阿娘吾勸汝相助去爲霖

霧

不知村道近曉霧漫塗中晴澹偏遮日罪微亦畏風豈  
能田麥潤徒解野花籠何不歸溪壑教人眼界空

沙

莽莽白無垠晴沙一望平舊痕留雁字新路有駝行岸  
遠雪俱合隄荒草不生欲知金在處著眼欠分明

趙陵鋪

驅馬常山道聞人說趙陵樹殘猶翠羽隧古尙魚鱗秦  
漢遺墟在蠻夷大長稱年年果食飢離酒問誰登

將至獲鹿

纔從平地得遙山便覺蕭然景象閒河勢迴看空闊處  
塵香已在翠微間樹懸絕壁高千尺雲擁孤城抱一彎  
此去鋤山知不遠好驅駿足快登攀

井陘縣古銅山

井陘道中

驅車過燕北周道平如砥兩馬快馳驅雙輪疾於矢日  
昨始入山乍見心猶喜今朝歷五陁崎嶇澀步履怪石  
虎當關窄徑珠穿螳上懸欲崩崖下臨不測水淮陰

用兵據險良有以拔幟復立幟奇功此創始我家居滇  
南迢迢萬峯裏一官繫京華旅食經十紀分符來晉都  
一郡勤待理唐魏古風淳居人屏華靡問俗愜素心回  
車徒增恥黽勉厲前修艱難敢自諉

### 入山西界

蟋蟀吟唐風儉嗇多憂思民居苦敝陋營窟古風氣崖  
腳版扉敝洞口蓬窗閉礙道石礪犂土瘠無美利野田  
惟種麥四月猶未穗云何多富賈萬金列市肆豈非惡  
衣食居積有由致我思古聖人時宜因地制章甫資適  
越終將見遺棄修教得遺規相安卽善治

荆石驛和焦笠泉學使韻

西來愁聽水湍湍三月東風送暮寒山壓孤村雲四壁  
路環深澗石千盤危途敢信馳驅易瘠土深知撫字難  
入政未諳新治譜焚香何日此心安

芹泉驛和焦笠泉學使韻

叱馭何心問路平一麾日日數郵程風傳唐國千秋古  
水掬芹泉一勺清仙吏昔年同珥筆笠泉與余同官翰林微官今  
日擅專城感恩未獲涓埃報入境翻慚父老迎

天門謠

朝上天門暮下天門天門高高行人斷魂車憂脫軸馬

虞失足馬蹶車覆當門痛哭乘堅策肥毋憂顛倒直上  
層霄衆山皆小仙人王喬贈我瑤草再拜食之後天而  
老乘彼青雲遨游帝闕高驂鸞鶴大笑蟻蛄

土窰行

土窰土窰匪棟匪宇鑿之空空避風避雨上世穴居民  
氣淳古獠獠狂狂實惟茲土蟋蟀鳴秋送彼殘暑野稻  
登場入此室處楸櫟我燒芋薯我煮飽食安卧如蟲坯  
戶以生以息綿綿父祖百年於茲毋俾失所

早出芹泉作

黃人捧銅盤杲杲出東方僕夫戒征車催我陟高岡高

何崔魏亂石卧路傍上有千年樹枝葉繆蒼蒼中留  
一綫天逶迤走羊腸涼風自西來吹露霜衣裳三月春  
已暮慘慄如秋光客子遠宦遊風景嗟異鄉回首望京  
華相去日以長凝煙蔽四野前路何茫茫

至晉陽

瘠馬陟長阪疲役山西路十日傳舍更千里關河度轉  
蓬心染塵看花眼迷霧初行無坦夷乍進彌深固曲徑  
環崖走陡澗橫木渡窮旁奇石撐橫縱古藤互傍穿蟻  
旋磨仰空猱升樹高關懸組引矮屋鑿坯住凝煙壩孤  
村歸鴉知日暮野店冷無食火炕燒徹曙饑惟殮餽飢

美難尋寒具形勞或夢鹿志壯猶叱馭始至晉陽城山  
樞欣可賦渾噩風存古鄙晉民敦素操刀憂手傷采風  
愜心慕事上詎弗獲使民益滋懼吾羨董安于善治千  
秋著

狄村唐槐

狄村有古槐枝柯如金鐵云是梁公植手澤仰前烈唐  
宋幾興亡今古同一瞥獨茲勁挺姿千載炎涼閱委置  
大路旁行人不敢折上有鳴鳳栖下無蟻蟻穴堅比貞  
女心直似忠臣節摩挲獲舊物正氣同鬱結王家堂前  
樹榮名同一轍云何此輪囷孫枝不再茁

出太原留別勞辛階同年

芸館依依已數年曾牽別袂

帝城邊豈知分郡來三

晉又復同官共一天爲政何殊

元發美滕元發守太論原有威名

交真愧叔牙賢分金雅誼今猶昔燒燭連宵話舊緣

時借子

賢斧

忻州道中

微雨不滑道筍興行款款北風吹袂涼四月秋已晚尋

徑入山腹煙雲自舒卷上留天一縷中道石九轉崖立

勢欲傾窰窰土已滿好山忽覺面書犁豁心眼藉此滌

塵襟蕭然忘軒冕

石嶺關

在太原城北

北捍并州恃此關  
巔崐怪石互迴環  
樹圍濃翠三間屋  
雲擁空青四面山  
懸巖刀空霜氣重  
沙陀弓賸月痕彎  
千年此地無征戰  
雲朔征車日往還

存趙孤處

趙氏昔構難  
岸賈實禍始  
同括齊并命  
書殺筆於史  
嬰齊存遺種  
不殺不能止  
有客嬰與白  
義存趙孤子  
抱兒匿山中  
趙鬼幸不餒  
歎息思古人  
掩卷淚如水  
今過存孤處  
豐碑題故址  
古木生悲風  
落日荒城裏

斷句卽景

林花着雨生紅田麥隨風漾綠一聲布穀催耕四野有人吐犢

九曲青山礙路一灣綠水揚波藉問長官旌旆何如漁父煙簑

雁門關遇萬葵田觀察

一笑相逢是故人天涯同幻宰官身關門雁影分南北

郵舍花香判舊新棘院風清尋昨夢

庚子余分校北柏闈葵田爲監試

廳霜冷話前因

同官御史

道傍傾蓋無多暇判袂匆匆又一

春

去年送葵田行亦於是時

雁門行

平沙堆雪草心白高崖矗天雲腳黑巨靈手擘錦屏開  
鑿空雄關界南北危途九曲窮躋攀獅虎怒蹲石巘崿  
手拍天門望大漠行人回首淚闌干鴻鴈賓秋暝色老  
蘆花瑟瑟汾陰道爲報上林蘇武書一年一度雙飛早  
駱駝小隊琵琶催斷送明妃胡地來青冢一堆春寂寂  
環佩無聲魂夜回石家天子何委靡割地甘爲耶律子  
坐令趙氏三百年燕雲不能爭尺咫颯颯北風戰馬嘶  
碧眼吹笳白骨悲李陵老去楊業死古今征戍幾人歸  
泰運天開重九驛塞上名王悉拱極毳帳平鋪庭戶間  
巖關未足稱險阨我攜玉龍出朔方青眼高歌聲激昂

葡萄滿泛玻璃紫一鞭驄驟快騰驤

吳家窰宿寧靜寺

冒暑事前征午汗流如綫狂風捲飛塵濡染鬚眉變沙  
平隨鴈遠路窄同駝轉興夫偃僕行推挽互手牽日暮  
烏知歸塗長人亦倦長官遣吏迎山盡蘭若見窠室三  
兩間鑿坯鮮營繕佛心不擇地淨境開生面人坐忘疲  
役禪意生歡忭說法伴老僧小住計良便

至朔平

篠簜徐引絳騶行雕嶺欣看稚子迎勁節凌霜終不改  
此心如水尙餘清願將勤儉酬黎庶慚乏涓埃報聖

明靜夜焚香時自警鬱林莫負舊家聲